



REPUBLIKA E SHQIPËRISË
UNIVERSITETI I ARTEVE
REKTORATI

Nr. 430/1 prot.

Tiranë, më 14.05.2020

RREGULLORE

MBI

“MARRJEN E MASAVE NDAJ COVID-19, NË UNIVERSITETIN E ARTEVE”

Kjo rregullore është hartuar në zbatim të ligjit nr. 80/2015 “Për arsimin e lartë dhe kërkimin shkencor në Institucionet e Arsimit të Lartë në Republikën e Shqipërisë”; Udhëzuesit të Ministrisë së Shëndetësisë dhe Mbrojtjes Sociale, Instituti i Shëndetit Publik nr. 496/12, datë 29.04.2020 “Për qëndrimin dhe lëvizjet në shkollë (COVID-19)”; Urdhrit të Ministrisë së Shëndetësisë dhe Mbrojtjes Sociale nr. 289, datë 04.05.2020 “Për miratimin e udhëzuesit për masat ndaj COVID-19 që duhet të ndërmarrin Institucionet Arsimore” dhe Vendimit nr. 34, datë 04.05.2020 “Për marrjen e masave për mbylljen e vitit akademik 2019-2020, për shkak të gjendjes së fatkeqësisë natyrore të shkaktuar nga pandemia e COVID-19, në Universitetin e Arteve”.

NENI 1

Objekti i Rregullores

1. Objekti i kësaj rregulloreje është përcaktimi i rregullave në Universitetin e Arteve për parandalimin e rrezikut të infeksionit me COVID-19 për të ruajtur vijimësinë e punës dhe përfundimin me sukses të vitit akademik 2019-2020. Masat e listuara bazohen në kërkesat përgjithësisht të zbatueshme të Ministrisë së Shëndetësisë dhe Mbrojtjes Sociale, Institutit të Shëndetit Publik dhe Organizatës Botërore të Shëndetësisë.

NENI 2

Hyrja dhe dalja në UART

1. Orari për hyrjen e studentëve në UART rregullohet sipas një grafiku, të hartuar nga Dekanatet e Fakulteteve përkatëse nën monitorimin e pedagogëve.
2. Studentët të paraqiten pranë Fakulteteve duke respektuar me përpikmëri orarin e komunikuar nga Sekretaritet përkatëse. Njoftimi nga ana e Sekretarive të kryhet 48-orë përpara zhvillimit të procesit mësimor.
3. Studentët hyjnë në UART pasi janë vendosur në radhë një nga një, me largësi 1.5 deri 2 metra.
4. Studenti që ka simptoma të ngjashme apo temperaturë përpara ardhjes në UART, njofton Sekretarinë përkatëse, për gjendjen shëndetësore e cila të kontaktojë me mjekun e familjes dhe të verifikojë nëse studentin është i sëmurë apo jo.



REPUBLIKA E SHQIPËRISË

5. Personi i caktuar nga UART, duhet të kryejë procedurën për matjen e temperaturës me termometër digjital, sprucim me alkool 60% ose dezinfektantë të tjerë në duar, për studentët, stafin akademik/administrativ si dhe për çdo person tjetër (vizitor). Gjithashtu duhet të kontrollojë të gjithë studentët që të jenë të pajisur me maskë mbrojtëse të fytyrës.
6. Nuk lejohet që studentet të dalin nga godina dhe të rikthehen përsëri në të brenda ditës.
7. Lejohet vetëm një hyrje dhe një dalje në UART.
8. Dalja nga ambientet e UART do të bëhet sipas rregullave, duke ruajtur distancimin social dhe fizik (1.5 deri 2 metra), nën mbikëqyrjen e personit të caktuar nga Fakulteti përkatës.
9. Studentët që nuk zbatojnë këtë rregullore, trajtohen me masë disiplinore nga Komisioni i Etikës dhe i Sjelljes, pranë UART.

NENI 3

Qëndrimi dhe mësimi në salla

1. Gjatë procesit mësimor, si nga pedagogu dhe nga studenti të respektohet distancimi social dhe fizik me njëri tjetrin dhe të jenë të pajisur me maskë dhe t'i mbajnë rregullisht ato.
2. Kur është e mundur, praktikohet mësimi në ambient të hapur (oborri i UART), duke respektuar largësinë dhe rregullat e mësipërme.
3. Nuk lejohet ushqimi brenda ambienteve të Fakulteteve.

NENI 4

Lëvizjet në mjediset e brendshme të UART

1. Lëvizja e studentëve në ambientet e Fakulteteve duhet të jetë e përcaktuar në mënyrë që çdo zonë të ketë numrin më të vogël të individëve që lëvizin në të, pa u takuar asnjë moment me studentë të tjerë, duke ruajtur distancimin social dhe fizik.
2. Komunikimi, në rast nevojë, i studentit me drejtuesit, sekretarinë dhe stafin akademik, do të kryhet nëpërmjet pedagogut përgjegjës, duke respektuar distancimin social e fizik dhe rregullat e tjera të përcaktuara më lart. Ky komunikim mund të jetë edhe nëpërmjet telefonit apo kompjuterit

NENI 5

Kujdesi për higjienën

1. Duhet të sigurohet uji i rrjedhshëm, sapuni i lëngshëm, letra për fshirjen e duarve dhe xheli me përmbajtje alkooli 60%, në ambientet e UART.
2. Çdo student në UART duhet të lajë duart pas çdo veprimi që mund të përbëjë rrezik për përhapjen e virusit.
3. Gjatë qëndrimit në ambientet e UART çdo individ duhet të mbajë detyrimisht maskë.
4. Dritaret duhet të mbahen të hapura, në çdo ambient gjatë kryerjes së procesit mësimor ose të paktën të ajrosen 5-6 herë gjatë kohës së zhvillimit.
5. Aktivitetet jashtëshkollore artistike në grup janë të ndaluara.
6. Të kryhet dezinfektimi i sipërfaqeve të çdo ambienti dhe orendive, me lëndë dezinfektuese, pas përfundimit të procesit mësimor.



REPUBLIKA E SHQIPËRISË

7. Përpara rifillimit të procesit mësimor në UART, çdo student duhet të plotësojë Formularin e Vetë-deklarimit për situatën e tyre shëndetësore dhe të familjarëve të tyre dhe ta dorëzojë pranë Sekretarive përkatëse, në rrugë elektronike/fizike. Mos paraqitja e këtij Formulari Vetë-deklarimi nga ana e studentit, përbën kusht për mos-pjesëmarrjen e tij gjatë procesit mësimor.

NENI 6

Sanitaret

1. Sanitaret të mbajnë gjatë gjithë orarit të punës maskën, dorezat dhe solucione dezinfektuese.
2. Korridoret pastrohen çdo dy orë.
3. Tualetet pastrohen e dezinfektohen çdo 30 minuta.
4. Dorezat e çdo klase/salle dhe mjedisi pune si dhe parmakët e shkalleve dhe vende të tjera pastrohen dhe dezinfektohen çdo 30 minuta.
5. Largimi nga UART bëhet pas përfundimit të pastrimit dhe dezinfektimit të çdo mjedisi të tij.
6. Kryen të gjitha detyrat duke respektuar distancimin social dhe fizik me studentet, stafin akademik dhe administrativ.

NENI 7

Roja i UART

1. Roja të mbajë gjatë gjithë orarit të punës maskën, dorezat dhe solucione dezinfektuese.
2. Roja nuk lejon prezencën e çdo individi tjetër brenda në UART (me përjashtim të studentëve, stafit akademik dhe administrativ).
3. Çdo kërkesë për komunikim me administratën UART të bëhet nëpërmjet numrit të kontaktit të përcaktuar paraprakisht.
4. Kryen të gjitha detyrat duke respektuar distancimin social dhe fizik me studentët, stafin akademik dhe administrativ.

VËMËNDJE:

**Të gjitha nenet e parashtruara më sipër, janë të detyrueshme të zbatohen me përpikmëri nga të gjithë studentët, stafi akademik dhe administrativ në UART.
Kjo rregullore dhe postera informues të afishohen në vende të dukshme në Fakultetet e UART.**